

Bil. 63

Rabu

4 Disember 2019



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEDUA
MESYUARAT KETIGA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Fasiliti Sukan Daerah Hulu Selangor**
- YB. Puan June Leow Hsiad Hui (*Hulu Selangor*) [Halaman 1]

- **Isu Pembinaan Balai Bomba dan Penyelamat di
Bandar Sungai Lembing dan Gambang, Kuantan, Pahang**
- YB. Tuan Mohd Shahr bin Abdullah (*Paya Besar*) [Halaman 4]

**MALAYSIA
KAMAR KHAS
PARLIMEN KEEMPAT BELAS
PENGKAL KEDUA
MESYUARAT KETIGA**

Rabu, 4 Disember 2019

Mesyuarat dimulakan pada pukul 2.30 petang

DOA

*[Timbalan Yang di-Pertua (Dato' Mohd Rashid Hasnon)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

Fasiliti Sukan Daerah Hulu Selangor

2.34 ptg.

Puan June Leow Hsiad Hui [Hulu Selangor]: Terima kasih Tuan Yang di-Pertua dan terima kasih Yang Berhormat Menteri.

Daerah Hulu Selangor terletak di utara Lembah Klang dengan keluasan 174 ribu hektar iaitu hampir sama keluasannya dengan negeri Melaka. Daerah ini merupakan daerah terbesar daripada sembilan buah daerah di negeri Selangor. Ia meliputi satu kawasan Parlimen Hulu Selangor dan tiga kawasan Dewan Undangan Negeri iaitu Batang Kali, Kuala Kubu Bharu dan Hulu Bernam.

Kepadatan penduduk di Hulu Selangor kini telah mencecah 300 ribu penduduk. Ini disebabkan faktor kedudukan strategik daerah yang berdekatan dengan pusat bandar serta kos sara hidup yang rendah menjadikan Hulu Selangor pilihan ramai untuk mendiami di daerah ini. Namun begitu, Hulu Selangor tidak mempunyai *facility* sukan bagi penganjuran program peringkat daerah. Oleh itu, Hulu Selangor mencadangkan agar pihak kementerian dapat membantu bagi mendirikan satu kompleks sukan daerah.

Untuk makluman pihak kementerian juga, Daerah Hulu Selangor mempunyai 68 buah sekolah tetapi tiada kemudahan sukan yang bersesuaian bagi menjalankan latihan. Ini amat mendukacitakan kerana Hulu Selangor mempunyai ramai atlet cilik terutamanya dalam bidang balapan. Atlet cilik ini sering kali menghadapi cabaran menjalani latihan kerana tiada kemudahan.

Malahan, penganjuran sukan peringkat daerah seperti Kejohanan Balapan Daerah Hulu Selangor anjuran Pejabat Pendidikan Daerah juga terpaksa menyewa kemudahan di UPSI memandangkan hanya *facility* ini yang lengkap dan berdekatan. Selain itu, sambutan Bulan Sukan Negara peringkat daerah Hulu Selangor pula hanya dapat dianjurkan di sekolah dengan kerjasama agensi daerah dan pihak sekolah. Ini merupakan satu kerugian kerana ketiadaan *facility* yang bersesuaian bagi penganjuran program belia mahupun kejohanan sukan.

Seterusnya, untuk makluman, atlet *motor cross* yang mengharumkan nama negara merupakan anak jati Hulu Selangor. Sekali lagi Hulu Selangor mohon pertimbangan kementerian mengenai permohonan satu *facility* sukan lasak khususnya *motor cross*. Dengan kewujudan *facility* ini, ia dapat menjadi pemangkin untuk mencungkil bakat baru belia dalam sukan lasak.

Selain itu, ia juga dapat dijadikan satu tarikan pelancongan sukan lasak di samping membuka peluang pekerjaan. Pembinaan *hub* sukan lasak bukan sahaja dapat mengurangkan gejala lumba haram, malahan dapat dijadikan platform untuk para belia, mempelajari teknik perlumbaan *motor cross* secara berhemah di dalam satu *facility* yang terjamin tahap keselamatannya.

Besarliah harapan Hulu Selangor jika pihak kementerian dapat turun padang dan melihat sendiri kekangan yang dihadapi. Permintaan sering diajukan dari pihak sekolah serta masyarakat setempat. Namun sehingga kini belum membuahkan hasil. Diharapkan pihak kementerian dapat memberi pertimbangan sewajarnya di atas permohonan ini demi memastikan perkembangan sukan akan terus meningkat serta membuka pelbagai peluang penganjuran aktiviti buat belia tempatan. Sekian, terima kasih Tuan Yang di-Pertua dan Yang Berhormat Menteri.

2.37 ptg.

Menteri Belia dan Sukan [Tuan Syed Saddiq bin Syed Abdul Rahman]: Terima kasih Tuan Yang di-Pertua. Saya ingin mengucapkan terima kasih di atas usul yang dibangkitkan oleh Yang Berhormat Hulu Selangor. Keprihatinan Yang Berhormat terhadap realiti yang dihadapi oleh rakyat Hulu Selangor khususnya berkaitan kemudahan sukan amat saya hargai.

Sememangnya menjadi keutamaan Kementerian Belia dan Sukan untuk melaksanakan proses naik taraf kemudahan sukan di seluruh negara bagi memastikan ia dapat dimanfaatkan sepenuhnya oleh rakyat. Buat masa ini, KBS sedang mengkaji dan meneliti semua projek naik taraf dan pembinaan baru kemudahan sukan di setiap negeri. KBS turut mencuba sebaik mungkin untuk mewujudkan atau menaik taraf kemudahan sukan di setiap kawasan Parlimen. Ini penting dalam memastikan semua kemudahan atau *facility* yang akan dibina dapat memberi manfaat dan digunakan oleh semua golongan rakyat.

Selain itu, tanggungjawab untuk membina kemudahan sukan ini bukanlah terletak di bahu KBS semata-mata. Malah ia perlu melibatkan usaha kolektif daripada pihak lain termasuklah kerajaan negeri dan pihak berkuasa tempatan. Justeru itu, KBS akan memainkan peranan yang lebih signifikan dalam mewujudkan jaringan kerjasama bersama pihak-pihak bertanggungjawab untuk merancang dan membina kemudahan sukan peringkat negeri dan daerah agar dapat memastikan keseimbangan pembangunan antara kawasan bandar dan luar bandar termasuklah di kawasan Hulu Selangor.

Untuk makluman Ahli Yang Berhormat, setakat ini terdapat 100 kemudahan sukan di kawasan Hulu Selangor yang mana lapan kemudahan diuruskan oleh KBS, 54 buah kemudahan diuruskan oleh kerajaan negeri, empat buah kemudahan diuruskan oleh pihak swasta dan 34 buah kemudahan diuruskan oleh lain-lain pihak. Sehubungan dengan itu, kementerian ini akan meneliti dan memperhalusi permohonan Yang Berhormat Hulu Selangor.

Pihak Jabatan Belia dan Sukan menerima baik cadangan membina kompleks sukan daerah memandangkan di Daerah Hulu Selangor tiada sebarang kompleks sukan untuk kemudahan orang ramai. Oleh itu, usul ini perlu diteliti terlebih dahulu dengan mengambil kira dari aspek kemudahan sukan sedia ada, bilangan penduduk, kos pembinaan, status tanah dan tempat yang sesuai untuk membina sebuah kompleks sukan daerah.

Berkenaan cadangan mewujudkan litar *motor cross*, Jabatan Belia Sukan Selangor (JBS) mencadangkan agar litar *motor cross* sedia ada dinaiktaraf iaitu di Sungai Dusun, FELDA Soeharto. Ini kerana kawasan ini berpotensi untuk dimajukan memandangkan litar tersebut sentiasa digunakan oleh peminat-peminat sukan *motor cross*. Ini juga dapat menarik lebih ramai lagi pelumba-pelumba dan penggiat sukan *motor cross* untuk beraksi di litar yang terletak di kawasan luar bandar.

■1440

JBSN juga baru-baru ini telah mengadakan *KBS Motor Cross Championship* peringkat negeri Selangor bertempat di Litar *Motor Cross*, Sungai Dusun FELDA Soeharto yang dimiliki oleh pihak kerajaan negeri dan persatuan. Antara kemudahan sukan sedia ada yang terdapat di Daerah Hulu Selangor adalah seperti berikut:

JENIS KEMUDAHAN	JUMLAH
Mini stadium	1
Gelanggang rakyat	10
Gelanggang bola tampar	6
Gelanggang boling	1

Gelanggang tenis	7
Gelanggang badminton	15
Gelanggang bola keranjang	7
Gelanggang bola jaring	5
Gelanggang takraw	8
Padang bola	18
Litar <i>motor cross</i>	3
Padang golf	4
Dewan serba guna	12
Padang menembak lapang sasaran	1
JUMLAH	98

Kami akan letakkan prioriti untuk menaik taraf infra sukan yang sedia ada khususnya yang terletak di kawasan luar bandar supaya ia dapat dimanfaatkan oleh semua rakyat di Parlimen. Walau bagaimanapun, turut terdapat banyak kemudahan sukan di kawasan Proton City Sport Centre dan UPSI Sport City yang berhampiran dengan Hulu Selangor dalam radius 20 kilometer. Terima kasih Yang Berhormat.

Isu Pembinaan Balai Bomba dan Penyelamat di Bandar Sungai Lembing dan Gambang, Kuantan, Pahang

2.41 ptg.

Tuan Mohd Shahar bin Abdullah [Paya Besar]: *Bismillahir Rahmanir Rahim. Assalamualaikum warahmatullahi wabarakatuh.* Terima kasih Tuan Yang di-Pertua dan terima kasih Yang Berhormat Timbalan Menteri.

Saya ingin membangkitkan isu permohonan pembinaan balai bomba dan penyelamat di kawasan Sungai Lembing dan Gambang, Kuantan Pahang. Isu setempat yang saya bangkitkan ini berhubung kait dengan kemudahan keselamatan dan kecemasan rakyat Paya Besar khususnya masyarakat di DUN Sungai Lembing dan Lepar.

Tuan Yang di-Pertua, untuk makluman, balai bomba dan penyelamat yang terdekat bagi kawasan Sungai Lembing iaitu Balai Bomba dan Penyelamat Bandar Indera Mahkota yang jaraknya lebih kurang 50 kilometer. Manakala balai bomba dan penyelamat yang terdekat bagi kawasan DUN Lepar iaitu Balai Bomba dan Penyelamat Taman Tas yang jaraknya lebih kurang 50 kilometer. Lebih mengkusarkan, balai-balai bomba ini tidak mampu untuk menampung kapasiti penduduk dan lokaliti di kedua-dua kawasan tersebut.

Tuan Yang di-Pertua, untuk makluman, kapasiti penduduk di kawasan DUN Sungai Lembing lebih kurang sebanyak 60,000 orang meliputi 50 lokaliti yang terdiri daripada kampung

tradisi, perkampungan Orang Asli, taman perumahan dan kawasan FELDA. Di Sungai Lembing juga terdapat banyak kawasan tarikan pelancong daripada luar dan dalam negara. Manakala bagi kawasan DUN Lepar, kapasiti pendudukan lebih kurang 40,000 orang penduduk meliputi 46 lokaliti yang terdiri daripada kawasan tradisi, perkampungan Orang Asli, taman perumahan dan kawasan FELDA. Dalam kawasan DUN Lepar juga terdapat banyak institusi pengajian tinggi seperti Universiti Malaysia Pahang Kampus Gambang, Universiti Islam Antarabangsa Kampus Gambang, Kolej Matrikulasi Gambang dan Kolej Komuniti Paya Besar.

Menyedari situasi ini Tuan Yang di-Pertua, keperluan yang mendesak perlu saya bangkitkan untuk mendirikan balai bomba dan penyelamat di Bandar Sungai Lembing dan Gambang atas beberapa faktor iaitu:

- (i) faktor jarak balai bomba yang sedia ada amat jauh dengan kawasan tersebut;
- (ii) balai bomba sedia ada tidak mampu untuk menampung kapasiti penduduk serta lokaliti kedua-dua kawasan yang terlalu besar juga dilihat sebagai faktor yang kuat untuk membolehkan balai bomba dibina di kawasan tersebut; dan
- (iii) faktor keselamatan penduduk juga menjadi asas penting untuk dipertimbangkan memandangkan banyak kes kebakaran pernah berlaku di kawasan tersebut menerima kelewatan bantuan penyelamat daripada pihak bomba dan penyelamat.

Tuan Yang di-Pertua, justeru, saya ingin memohon pihak kerajaan menyatakan pendirian terhadap usaha membina kemudahan keselamatan rakyat ini dan jika kerajaan bersetuju, bilakah tarikh dan apakah perincian jadual kerja khususnya tempoh pembinaan dan spesifikasi kerja bagi menjayakan pembinaan balai bomba dan penyelamat ini. Sekian terima kasih Tuan Yang di-Pertua dan terima kasih Timbalan Menteri.

2.44 ptg.

Timbalan Menteri Perumahan dan Kerajaan Tempatan [Dato' Raja Kamarul Bahrin Shah bin Raja Ahmad Baharuddin Shah]: *Bismillahir Rahmanir Rahim. Assalamualaikum warahmatullahi wabarakatuh* dan salam sejahtera.

Tuan Yang di-Pertua, terima kasih Yang Berhormat atas keprihatinan keselamatan rakyat yang berkaitan dengan kemudahan penyelamatan daripada bomba.

Untuk makluman Yang Berhormat, Kementerian Perumahan dan Kerajaan Tempatan terlebih dahulu mengucapkan terima kasih atas apa Yang Berhormat telah kemukakan kepada kita

di kawasan Parlimen Paya Besar terutamanya di kawasan Sungai Lembing dan Gambang. Adalah menjadi hasrat kementerian agar *response time* bagi setiap kawasan Parlimen di seluruh negara dapat dipendekkan untuk menyelamatkan nyawa dan mengurangkan kemusnahan harta benda serta kemusnahan alam sekitar.

Sebagaimana Yang Berhormat sedia maklum, pada masa ini kedua-dua kawasan mendapat perlindungan kebombaian dari Balai Bomba dan Penyelamat Taman Tas dan Balai Bomba dan Penyelamat Indera Mahkota. Selain daripada itu, ia juga mendapat sokongan dari Pasukan Bomba Sukarela Gambang dan Pasukan Bomba Sukarela Sungai Lembing yang dilengkapi dengan kereta bomba sukarela berserta peralatan pemadaman.

Justeru, bagi tujuan meningkatkan prestasi *response time* ke kawasan-kawasan tersebut, KPKT telah mengambil langkah proaktif dengan memohon projek balai bomba di kawasan Sungai Lembing dan Gambang untuk dimasukkan ke dalam RMKe-11, *Rolling Plan* Ke-4 Tahun 2020.

Bagi permohonan pembinaan balai bomba baru Sungai Lembing, cadangan tapak yang telah dikenal pasti ialah di Mukim Hulu Kuantan, Sungai Lembing, Paya Besar. Untuk makluman Yang Berhormat, yang terkini adalah pada minggu lepas premium tanah untuk projek tersebut telah dibayar sebanyak RM258,615 di mana ia akan dimiliki untuk pembinaan projek tersebut.

Manakala bagi pembinaan balai bomba di kawasan Gambang, permohonan melibatkan pembelian bangunan sedia ada yang terletak di Bandar MEC, Gambang. Dengan membeli bangunan yang sedia ada, ini akan mempercepatkan pelaksanaan projek dan juga harganya sedikit murah kepada *conventional construction*. Walau bagaimanapun, permohonan bagi kedua-dua projek tersebut tidak dipertimbangkan oleh agensi pusat.

Justeru, KPKT akan membuat rayuan semula kepada agensi pusat agar projek Balai Bomba dan Penyelamat Sungai Lembing dan Balai Bomba dan Penyelamat Gambang dapat diluluskan bagi membolehkan masyarakat di kawasan Paya Besar menerima perkhidmatan kebombaian yang lebih efisien. Dari segi perancangan, kita telah membuat apa yang upaya kami dan juga membeli sebahagian daripada aset yang diperlukan. Kementerian juga akan memaklumkan kepada Yang Berhormat, status perkembangan permohonan kedua-dua projek tersebut dari semasa ke semasa. Sekian, terima kasih Tuan Yang di-Pertua.

Timbalan Yang di-Pertua [Dato' Mohd Rashid Hasnon]: Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, esok Khamis 5 Disember 2019.

[Kamar Khas ditangguhkan pada pukul 2.48 petang]